

Del 1 Alminnelege bestemmingar

§ 1 Prinsipp for vurdering av søknadar om sals- og skjenkeløyver

Søknadar om sals- og skjenkeløyver skal avgjerast i tråd med alkohollova og bestemmingar gjeve i medhald av denne. Søknadane skal i tillegg vurderast i tråd med vedtekne prinsipp og målsettingar fastsett i Ulvik herad sin rusmiddelpolitiske handlingsplan, og her under alkoholpolitiske handlingsplan. Der det ikkje står anna i desse retningslinene, gjeld ordlyden i alkohollova og bestemmingar gjeve i medhald av denne.

Søknad om utviding av skjenkeområde og skjenkeløyve i einskildhøve skal vera levert til kommunen seinast tre veker før løyvet skal takast i bruk. Kommunen skal avvise søknad som kjem inn etter fristen.

§ 2 Definisjonar

Alkoholhaldig drikk gruppe 1 er drikk som inneheld over 2,5 og høgst 4,7 volumprosent alkohol. Alkoholhaldig drikk gruppe 2 er drikk som inneheld over 4,7 og mindre enn 22 volumprosent alkohol. Alkoholhaldig drikk gruppe 3 er drikk som inneheld mellom 22 og 60 volumprosent alkohol.

§ 3 Løyveperioden

Sals- og skjenkeløyver kan gis for inntil 4 år av gangen. Det nye heradsstyret etter heradsstyrevalet kan vedta at alle eller nokon løyver skal løpe utan fornying kvart 4. år, men berre etter ein revidering av alkoholpolitiske retningslinjer. Sals- og skjenkeløyver kan også gis for ein tidsavgrensa periode, for ein bestemd del av året eller for eit einskildhøve. For einskildhøve er det spesifisert egne villkår, jf. § 5.

Del 2 Skjenkeløyve

§ 4 Tildeling av alminneleg skjenkerett for alkoholhaldig drikk gruppe 1,2 og 3.

1. Skjenkerett for alkoholhaldig drikk gruppe 1,2 og 3 kan tildelast til overnattingsplassar, restaurant, pub, bar, diskotek, kafe, bistro og serveringsplass knytt til gardsturisme.
2. Hotell og overnattingsplassar kan få løyve til alkoholhaldig drikk i gruppe 1 og 2 i minibar på overnattingsrom, samt for skjenking av gruppe 1 og 2 frå resepsjon heile døgnet for komsumering på overnattingsrom. Dette gjeld ikkje campinghytter.
3. Skjenkerett på uteareal vert gjeve etter ein konkret vurdering av kvar enkelt sak. Følgjande moment skal vurderast: Ro- og ordensmessige omsyn, trafikk, tilgjenge og omsyn til fri ferdsel. Skjenketida utandørs kan avgrensast om ro- og ordensmessige omsyn og/eller omsyn til omkringliggjande naboer tilseier dette. På skjenkeareal ute kan det skjenkast same gruppe alkohol som det er gjeve løyve til inne. Skjenkeareal ute skal som hovudregel avgrensast fysisk med gjerde eller liknande som omsluttar heile skjenkearealet.

Det vert ikkje gjeve alminneleg skjenkeløyve til:

1. Idrettshallar og skular/barnehage. I idrettshallar kan det verta gjeve løyve ved særskild spesielle høve, når det ikkje er mogeleg å finne alternative lokalar som er store nok, t.d. ved større konsertar.
2. Frisørsalongar, spa og andre plassar som primært sel andre typer varer og tenester.

§ 5 Skjenkeløyve for einskildhøve:

1. Det kan tildelast skjenkeløyve for alkoholhaldig drikk i gruppe 1 og 2 for einskilde høve i forsamlingslokale med eventuelt uteområde. For skjenking på uteområde gjeld same krav som i § 4-3. Det vert ikkje gjeve skjenkeløyve for idrettsarrangement.
2. Det vert sett som villkår at det er ein skjenkestyrar og ein stedfortredar.
3. For å få løyve til einskildhøve må det vere minimum 18 år aldersgrense til skjenkelokalet. Det kan søkjast om dispensasjon ved særskild spesielle arrangement der det vil vere naturleg å gje adgang til ungdom under 18 år. Dette kan t.d. vere konsertar, revy eller andre kulturelle arrangement.
4. Brot på villkåra sett i løyvevedtaket og alkohollova kan medføre karantene for både huseigar og arrangør.
5. Det er sett minimumskrav til tal på vaktar/ mannskap for einskildhøver.

§ 6 Ambulerande skjenkeløyve

a) Det vert ikkje gjeve ambulerande skjenkeløyve i Ulvik.

§ 7 Tilverking av alkoholhaldig drikk for skjenking i eiga verksemd

a) Eit ordinært skjenkeløyve kan etter søknad utvidast til å omfatta tilverking av alkoholhaldig drikk som ikkje er brennevin, eller til innførsel av slik alkoholhaldig drikk som løyvet gjelder, for skjenking i eiga verksemd. Løyver gitt for ein bestemd del av året eller ved einskildhøver kan ikkje utvidast til å gjelda innføring, men kan gjelda tilverking for skjenking i eiga verksemd.

b) Kvar einskild søknad vert vurdert individuelt. Det vert sett som krav at tilverkinga inngår som ein del av verksemda sin heilhetlege karakter og serveringstilbod. Det skal mellom annan leggast vekt på lokale tradisjonar, og om tilverkinga fremmar lokal kultur og turisme. Tilverkinga skal skje ved skjenkeklassen.

§ 8 Skjenketider

1. a) Inne: Skjenking av alkoholhaldig drikk med 22 volumprosent eller meir (gruppe 3) kan skje frå kl. 13.00 til kl. 00.30. Skjenking av anna alkoholhaldig drikk (gruppe 1 og 2) kan skje frå kl. 12.00 til kl. 02.00. Hotell og overnattingsplassar kan i tillegg skjenke gruppe 1 og 2 heile døgeret til sine overnattingsgjestar for konsumering på overnattingsrom. Dette gjeld ikkje campinghytter. Skjenkinga må skje ut frå resepsjon, romservice eller i minibar på overnattingsrommet. Det er ikkje høve til å skjenke ut frå bar eller restaurant etter skjenketida.
2. b) Ute: Skjenking av all alkoholhaldig drikk med 22 volumprosent eller meir (gruppe 3) kan skje frå kl. 13.00 til kl. 00.30. Skjenking av anna alkoholhaldig drikk (gruppe 1 og 2) kan skje frå kl. 12.00 til kl. 02.00.

§ 9 Utviding av skjenkeområde

1. Det kan etter søknad verta gjeve løyve til utviding av eit skjenkeområde for alminnelege løyver. Kommunen gjer vurderingar etter alkohollova §1-7a for kvar einskild søknad, og søknaden skal sendast til politiet for uttale.
2. Utviding av skjenkeområde gjeld for dei alkoholgruppene som løyvehavar har rett til å skjenke. Skjenketid følgjer dei vedtekne skjenketidane som løyvehavar har fått, men kommunen kan innskrenke skjenketidane ved utvida skjenkeområde.
3. Alle arrangement må meldast til politiet, som kan sette andre krav til vakthald i hht lokale politiforskrifter.
4. Det vert sett krav til vaktar for utvida skjenkeområde slik:

Arrangement inntil 100 gjestar	Minimum 2 stk
Andre arrangement enn dans med meir enn 100 gjestar	Minimum 4 stk
Dans med 100- 300 gjestar	Minimum 6 stk
Dans med meir enn 300 gjestar	Minimum 9 stk – endeleg vaktkrav vert sett i lag med politiet etter ei risikovurdering

Del 3 Salsløyve

Alkoholova §3-1 (Retten til sal av alkoholhaldig drikk) seier at sal av alkoholhaldig drikk i gruppe 2 og 3 berre kan skje gjennom AS Vinmonopolet på grunnlag av kommunalt løyve. Sal av anna alkoholhaldig drikk (gruppe 1) kan berre skje på grunnlag av kommunalt løyve, og gjeld for ein bestemd type lokale og bestemd type verksemd. Det kan etter forskriften §3-2 ikkje gjevast salsløyve til bensinstasjon eller kiosk. Kommunen står relativt fritt til å velje kva type verksemd som skal få løyve eller ikkje, men Ulvik herad har ingen retningsliner for kven som kan få løyve til sal av alkoholhaldig drikk utover det som er nemnd i forskriften.

§ 10 Utviding av salsområde

a) Det kan etter søknad, ved særskilde høve, verta gjeve løyve til utvida område for sal av alkoholhaldig drikk opp til 4,7 volumprosent. Særskilde høve er festivalar, messer og kurs. Det kan ikkje skjenkast og seljast alkoholhaldig drikk i same lokale.

§ 11 Tilverking av alkoholhaldig drikk for sal i eiga verksemd

1. a) Eit ordinært salsløyve kan etter søknad utvidast til å omfatta tilverking av alkoholhaldig drikk i gruppe 1 (opp til 4,7 volumprosent), eller til innførsel av slik alkoholhaldig drikk, for sal i eiga verksemd. Løyver gitt for ein bestemd del av året eller ved einskildhøve kan ikkje utvidast til å gjelda innføring og tilverking.
2. b) Kvar einskild søknad vert vurdert individuelt. Det vert sett som krav at tilverkinga inngår som ein del av verksemda sin heilhetlege tilbod og karakter. Det skal mellom anna leggjast vekt på lokale tradisjonar, og om tilverkinga fremmar lokal kultur og turisme. Tilverkinga skal skje ved salsplassen.

§ 12 Salstider

Salstider i butikkane skal vera i samsvar med maksimaltida i alkohollova:

1. a) Kvardagar kl. 08.00- 20.00
2. b) Laurdagar og dagar før heilagdagar kl. 08.00- 18.00.

Del 4 Gebyr

§ 13 Gebyr for einskildhøve

1. Ved søknad om skjenkeløyve for einskildhøve skal det betalast eit gebyr for sakshandsaming. Det skal betalast for tilskipingar der forventa tal deltakarar er frå:

0-100 personar/ gjestar	kr. 600,-
100- 200 personar/gjestar	kr. 1.500,-
meir enn 200 personar/gjestar	kr. 3.000,-

2. Om det ved kontroll syner seg å vere fleire gjestar enn oppgjeven i søknad, vert det sendt justert krav etter punkt a.
3. Om arrangementet vert avlyst, skal det berre betalast eit gebyr på kr 500,-.
4. Ved søknad om salsløyve ved einskildhøve skal det betalast eit gebyr for sakshandsaming på kr. 600,-.